



18. nov 2020

UKA2020/131

Innarluutilinnik sullissisut atorfillit ilinniagaqarnissamut, ingerlaqqiffiusumik ilinniagaqarnissamut pikkorissarnissanullu pisariaqartitsinermik naammassinnittussamik ataavartussamik Naalakkersuisut periusissiorlutillu iliuusissatut pilersarusiornissaannut piumasaqarfigineqarnissaat pillugu Inatsisartut aalajangiiffigisassaattut siunnersuut. Periusissiami iliuusissatullu pilersaarummi suliniutaasut anguniagassatut allassimasunut naapertuunnersut piffissap ingerlanerani nalilersuisarnissaq ilaassaaq. Periusissiatut iliuusissatullu pilersaarut saqqummiunneqassaaq kingusinnerpaamik UKA2021-mi. (Inatsisartunut ilaasortaq Sofia Geisler, Inuit Ataqtigiit)

Inatsisartunut ilaasortaq Sofie Geisler, Inuit Ataqtigiit saqqummiussaqqarpoq Innarluutilinnik sullissisut atorfillit ilinniagaqarnissamut pikkorissarnissanullu naammassinnittussamik Naalakkersuisut periusissiorlnissaannut piumasaqarfiginissaat pillugu Inatsisartut aalajangiiffigisassaannik tamannalu oqaaseqarfigissavarput.

Siunnersuut saqqummiunneqartoq soqutiginarluinnarpoq, pingaartumik innarluutilinnik, kiisalu angerlarsimaffinni sullissisartut, utoqqaat illuini, aammalu ilaatigut puigortunngortut eqqarsaatigalugit, meeqqat angerlarsimaffinni, meeqquerivinni kiisalu innarluutilit paarineqartarfiini ulloq unnuarlu ingerlasuni. Aammalu tarnimikkut napparsimasut meeqqat inuusuttunnguillu inersimasullu amerliartuinnartut nalunaarutigineqarput. Taamaattumik sulisoqarnikkut pissutsit ilungersunarsinnaasartut eqqarsaatigalugit pikkorissarnissamut ilinniagaqarnissamullu periarfissat ullumikkornit pitsaanerusumik inissinneqartariaqalerput inuit sullinneqartut eqqarsaatigalugit.

Ullumikkut ilisimareerparput Innarluutilinnik sulisorpassuit ilungersuussilluarlutik sullissinerat assut qujassutissaammat tapeersersortariaqarlutillu. Aammalu inulerinermik ilinniarsimanngitsut amerlasuut sulisorineqartut eqqarsaatigalugit pikkorissarneqartarnissaat minnerunngitsumillu aamma ilinniagaqarnissamut siuarsaanissat sulisorisat eqqarsaatigalugillu tapersersorlugillu ingerlattariaqalermata.

Ukiuni makkunani inuit taakkartorneqartut kiffartuunneqarnerini sulisut ullumikkornit sulineranni pitsaanerusumik avatangiiseqarnissaq pingaartorujussuusoq aammalu sullinneqartut eqqarsaatigalugit pitsanngorsaasoqarnissaa siunnersuuteqartup saqqummiussaa soqutiginarluinnarmat tamakkiisumik tapersorniarparput.

Aammalu sulisoqarnikkut illersorneqarsinnaasumik ingerlassappat suliffigissaanissat avatangiisillu atugassarititaasullu eqqarsaatigalugit pitsanngorsaanaasaaq piaartumik anguniartariaqarparput. Aamma massakkumut ilisimasat pitsanngorsagassallu eqqarsaatigalugit amerlasuut pigineqareermata piaartumik aallartinneqarsinnaasut.

Siunnersuumi tunngavilersuutigineqarpoq ilaatigut pilersaarutit pillugit periusissiaqannginneq pissutigalugu anguniakkat iliutsillu imminnut ataqtigiikkunnaarnerannik kinguneqarsinnaasutut ernumanartinneqartoq tamannalu assortussallugu itigartissalluguluunnit assortorumiinaappoq.

Tassami ukiuni makkunani perorsaaq aammalu assigiinngitsunik paaqqinnittarfinni sullissisut sulinerminni atugaat assut malunnartumik sulisoqarniarnikkut nalaanneqartartut

ilungersunarsiartuinnarput pingaartumik aamma sulinerminni avatangiisit atugassarititaasullu minnerunngitsumillu aningaasarsiat appasippallaarnerat annertuumik ajornartorsiutaasoq.

Perorsaasutut ilinniarsimasortagut ajoraluartumik amerlasuut suliffinnut atugarissaarfiunerusunut aningaasaqarnikkullu atugarissaarfiunerusunut nuuttarnerat tupinnarpallaanngilaq, paaqqinnittarfinni sulisut pigiinnarneqassappata taava pikkorissaanerit ilinniartitsierillu suli annertusarneqarnissaat pinngitsoorneqarsinnaanngilaq aamma inuit sullinneqartut ikiorluarneqarnissaat anguneqassappat.

Isumaginnittoqarfinni paarsiffiusuni sulisut ilinniarsimanngitsut ukiorpassuarni sulisimasut aamma sulinermik pitasaasumik aningaasarsiatigullu isumannaariffiginiarnissaat ilinniartitaanikkullu qaffassarneqarnissaat aaqqinniartariaqarpoq sulisut suliffimmiiginassappata.

Siunnersuut soqutiginarpoq tamakkiisumik taperserlugu ataatsimiititaliamut suliassanngortipparput, tassami ukioq 2022 aatsaat upernaakkut saqqummiunneqassappata taava aatsaat ilimagisinnaavarput ukioq ataasiinnaanngitsoq aatsaat qaangiuppat nalunaarusiaq isummersorfigineqarsinnaalissasoq tamannalu kingusippallaartutut isigalugu Naalakkersuisut akissuteqataat isumaqatiginngilarput.

Tassami maani ungasinngitsumi inersuarminni eqqartorparput tarnimikkut napparsimasut amerliartuinnartut ikiorsiiniartarnerpullu assut arriisumik ingerlasartoq aamma ilaqutaasunik saaffissaarussimasunik pisortanillu tusaaneqanngitsutut misigisimasunik apuussisoqartarmat.

Sofie Geisler Inuit Ataqtigiit tamakkiisumik taperserlutit siunnersuutit taperserparput.

Hans Enoksen